

Xlimactuy xcarta Apóstol Pablo huantu tzóknilh Timoteo

XATAPAJMUJUN TACHIUIIN:

Yumá xlimactuy carta huantu apóstol Pablo tzóknilh Timoteo ayuj luhua xtachuná huantu luhua pulana titzóknilh, sampi yumá c-carta litakalhchuhuinancán Timoteo pi huantu akstítum catláhuah xtascujut Cristo, chu calipahua, chu catayánilh c-xlatámat xtachuná “lantla chatum sculujua xtropa Jesucristo” (2:3). Xahua huanicán pi cumu akstítum nalipahuán Cristo, chu nalichihuinán xtachihuin, luhua huantu nalimaakapulicán, hasta naliputzastalacán laquimpi nasokalicán, natamacanucán c-pulachin, usu nachihuilicán, chu luhua huantu nalimapatinicán caj xpalacata pi liscujma Cristo. Huampi lacatancs huanicán Timoteo, pi lapi xlicana lacxtum taniyahu Cristo mima quilhtamacú acxni lacxtum natamapaksinanachahu c-xpumapaksín.

Xahuachí litakalhchihuinancán Timoteo pi xliankalhín quilhtamacú calikaltahuakalh yamá xtachihuin Dios huantu makán tatzoktahuilanit c-Likalhtahuaka (3:15-16).

Yumá c-xcarta San Pablo lichihuinán lantla aya makasá patinanit c-pulachin, chu puhuan pi aya talacatzuhuima quilhtamacú acxni namaknicán. Squiniy litlán Timoteo pi na fuerzaj catlahuánilh laquimpi tlajanán, usu natayaniy c-xlatámat, chu camakantaxtikolh huantu Dios lilacsacnit xtachuná lantla xlá xmakantaxtinít c-xlatámat.

Pablo lipaxuhu xakatlilacán Timoteo

1 Quit Pablo, xapóstol, usu xtalakachan Jesucristo, sampi chuná lacásquilh Dios pi mákat nacán liakchihuinán yamá lipaxuhu latámat huantu xlá malacnuy namaxquikoy xlipacs huanti nalipahuankoy Cristo Jesús. ²Luhua cana lipaxuhu ctzoknimán yumá carta huix Timoteo huanti cpxaquiyán xtachuná lantla xlicana quincam. Quit clacasquín pi Quintlatican Dios, xahua Quimpuchinacan Jesucristo

xataxajni camaxquín xtapáxquit, chu xtalakalhamán, xahua huantu tlan latámat.

Pablo luhua lacapastacacán Timoteo

³Timoteo, chalí chalí lacatzisa, chu catzísni acxni ctlahuaniy oración Quintlatican Dios, huanti akstítum clascujnima xtachuná lantla xlipahuankoy, chu cscujnimakó xalakmakān quinaltlatnacán quin judíos, quit clacapastacán, chu cpxacatatziniy Dios xpalacata huantu tlhuanit c-milatámat. ⁴Acxni quit

clacapastacá lantla huix tasá acxni tapapizihu, hasta caj ucu xacucxilhni cphuán laquimpi chuná xackalhipá tapaxuhuán caj mimpalacata.

⁵Sampi quit stalanca ccatziy lantla akstítum lipahuana Cristo, masqui xlicana pi pulana huá lipahuanit tama xatzicana minana huancán Loida, xahua mintzi Eunice; huampi na lacatancs maluloka pi huix na chuná akstítum lipahuana. ⁶Huá xpalacata clistacyahuayán pi camahuixcáni tama xlitlihuaka Dios huantu huix maklhtínanti yama quilhtamacú acxni quit tláhuah oración mimpalacata, chu ctiljacchipán quimacán.

⁷Sampi Dios ni quincamaxquinitán xlitlihuaka Espiritu Santo laquimpi caj chapecua nalatamayahu, huata huá quincalimaxquinitán laquimpi nakalhiyahu litlihuaka natayaniyahu c-quilatamatcán, chu tlan talacapastacni, chu laquimpi napaxquikoyahu caxaticahua chixcú.

⁸Niucxni tilimaxanana lantla tancs namaluloka pi lipahuana Quimpuchinacan Jesús; na ni pala quit, niucxni quintilimaxanana pi cpatinama c-pulachin caj xpalacata pi na clipahuán Cristo. Huata huix catatayani tama litlihuaka huantu Dios maxquiyán, masqui lhuhua huantu lipatiya c-milatamat caj xpalacata mintacanajla, chu pi lichihuínampat tama lipaxuhu xtachihuín Cristo huantu mastay akaputáxtut. ⁹Dios quincalakmaxtún, chu quincalilacsactasanin laquimpi namacamaxquiyahu quilatamatcán, huampi ni huá quincalikalhamán caj xpalacata pala tú tlan tascújut makantaxtihu, huampi huá chuna tuncán xlihcahuilínit pi naquincalakmaxtuyán sampi quincapaxquiyán, chu antá stalanca masíyulh c-xlatamat Cristo Jesús. Hasta lantla Dios ni xamalacatzuquiy catuxáhuat xlá

chunatiyá xquincalacsacnitán, chu quincapaxquimaná. ¹⁰Huampi acxni chú macámilh Quimaakaputaxtinacan Jesucristo catuxáhuat, luhua lacatancs malúlokli pi xlicana quincalakalhamanán. Antá c-cruz xlá makatlájalh xlipacs xlitlihuaka xpuchina calínin, chu caj xpalacata yuma xasasti xtamacatzinín huantu mastay akaputáxtut antá stalanca quincamacatzinimán lantla nakalhiyahu yama lipaxuhu latámat huantu niucxnicú laksputa.

¹¹Dios quililácsaclí laquimpi nacliakchihuínán tama xasasti xtamacatzinín, chu quilimáxtulh xapóstol, usu xtalakachán huanti canihua nacán liakchihuínán, chu masiyuy lantla tlan nakalhicán yuma akaputáxtut huantu malacnuy. ¹²Pus huá xpalacata quit clitayanima masqui lhuhua huantu cpatima yunú c-pulachin; huampi ni pala tzinín ctalactuhuaja sampi stalanca ccatziy ti emacamaxquinit quilatamat, xahua ccatziy pi Dios kalhiy litlihuaka laquimpi naquimaktakalha, nitú naquiakspulay hasta nakalchán quilhtamacú acxni nacmakantaxtikoy yuma xtascújut huantu quimacuintajlinit.

¹³Huix akstítum calilatapa tama xatlan talacapastacni huantu quit masiyuninítán, xahua mintacanajla, chu yama tapáxquit huantu quin kalhiyahu pi huá macxtum tahuanitahu Cristo Jesús. ¹⁴Camaxqui quilhtamacú tama Espiritu Santo huanti lama c-quilatamatcán pi namaktayayán laquimpi lihuana namakantaxtiya mintascújut huantu Dios lilacsacnitán pi nalikchihuínana xtachihuín.

¹⁵Huix catziyatá pi xlipacs yama natalanin huanti unú xuilakó, huanti xala c-xatiyat Asia, lhtuj quimakaxtakkolh, na chuná quintlahuakolh quintalacan

Figelo, xahuá Hermógenes; xlicana pi luhua quimakalipuhuanakolh acxni chuná quintlahuakolh. ¹⁶Quit clacasquín pi Quimpuchinacán calakalhamankolh, chu camaktayakolh Onesíforo, chu xlinatalán, sampi xlá maklhuhua quimahuixcánih, chu quimaakpuhuanáñih acxni quit xalipuhua, chu ni quilimaxánalh masqui quit xactanuma c-pulachin. ¹⁷Chí huampi acxni milh unú c-xacachiquín Roma quilacapúzalh hasta quimanóklhulh. ¹⁸Pus hua Quimpuchinacán calakalhamalh, acxni nalachán yama quilhtamacú natatlahuakoy cuenta xlipacs tachixcuhuítat, sampi huix stalanca catziya lantla xlá quimaktayalh acxni xlamachahu c-xacachiquín Efeso.

**Huanicán Timoteo pi casculi
xtachuná lantla chatum
sculujua xtropa Jesús**

2 Huampi huix quincam Timoteo, huix catziya lantla quincapaxquiyán Cristo Jesús ti tancs lipahuanahu, chu xlá namaxquiyán litlihuaka namakantaxtiya mintascújut. ²Pacs yama tamasiyún huantu huix kaxpatniña pi cmasiyunikonit luhua chixcuhuín laquimpi akstítum nalipahuankoy Cristo, clacasquín pi huix na huatiya litum namasiyunikoya makapitzin xatalipahu chixcuhuín hasta acxni xlacán na akstítum nalipahuankoy Cristo laquimpi na chuná xlacán huatiya litum namasiyunipalakoy xamakapitzín.

³Huix pacs tlan catlahua, chu capaxuhuanalipi huantu akspulayán xtachuná lantla chatum sculujua xtropa Jesucristo.

⁴Acxni chatum tropa makantaxtima xlitascújut huantu lakayahuacanit, nitú tiliscujpalakay atanuj tascújut huata caj xman huá liscuja huantu limapaksicanit laquimpi chuná namakapaxuhua

xpuxcu. ⁵Pus na chuna litum acxni chatum kamaná huanti latlajama pala xatí atzinú tlak tlan kamanán, xlicana pi ni catimaxquica xtrofeo, usu xtataquín pala ni chuná namakantaxtiya lantla xlikamánat xuanit. ⁶Na chuná camakantaxti mintascújut xtachuná lantla yama chixcú huanti scujma, chu chananama c-xpúcxutu, tancs tlahuay xtascújut sampi catziy pi pulana huá lakchán nalihuayán huantu antá namakalay. ⁷Xlipacs yuma huantu quit cuanimán, huix lihuana calacapástacti lantla tzinú namaclacasquina c-milatámat, xahuá Dios namaktayayán laquimpi naakataksa xlipacs huantu huix cuanimán.

⁸Xahuachí niucxni tipatzankaya nalichihuinaná Jesucristo; pus hua yuma tachihuín huantu quit clitakalhchihuínankoy tachixcuhuítat, pi Cristo huá xquilhtzúcut xuanit xamakan kolutzin rey David, chu cumu xCam Dios huá lilakastakuánalh calinín. ⁹Xlicana pi caj xpalacata cliakchihuínama yuma xasasti xtamacatzinín luhua tapatín huantu quit clipatima, chu hasta caj huá xpalacata masqui quilimacachicanit cadena xtachuná lantla chatum makníná; huampi masqui quit quinchicanit, yama xtachihuín Dios nitú chimaca. ¹⁰Pus hua yumá xpalacata quit clitayanima masqui luhua huantu cpatima c-quilatámat laquimpi chuná naclimaktayakoy yama huanti Dios lacsackonit, laquimpi xlacán na nakalhikoy yama akaputáxtut, chu lipaxuhu latámat huantu niucxnicú laksputa lapi nalipahuankoy Quimpuchinacan Cristo Jesús. ¹¹Luhua xtalulóktat yama takalhchihuín huantu chuná namá huan:

Lapi quin tancs catziyahu pi aya taninítahu Cristo,
pus na quilicanajlatcán pi acxtum
natalatamayachahu c-akapún.

- ¹² Lapi huá chū paxuhuanalenahu tapatín caj xpalachata, na tancs cacatzihu pi laxctum natamapaksinanahu. Huampi lapi quin ni litayayahu c-xlacatincan lihuhua pi lakapasahu, pus na ni pala huá catilitáyalh pala quincalakapasán.
- ¹³ Huampi masqui lakachunín quin ni luhua xlicana akstítum lipahuanahu, huampi xlá chunatiyá quincalakalhamanán. Sampi ni lay caj naaksanínán, chu ni namakantaxtiputún huantu aya quincamalacnüninítán.

Pablo huaníy Timoteo pi tancs camakantáxtih yamá tascújut huantu Dios lilacsacni

- ¹⁴ Huix lihuana camalacapastacnikó natalanín, chu calimapaksikó c-xlacatín Dios pi niáhl calalíakslokokolh yamá tachihuín huantu nitú kalhiy xlakasi, sampi xlicana pi takslokón nitú tlajanicán, huampi huata caj lilaclatayakoy huanti kalhacaxmatkoy.
- ¹⁵ Čana huix, fuerza catlahuaní lihuana namakantaxtiya mintascújut huantu Dios lilacsacnítán, laquimpi chuná nalítaxtuya çatum tlan cscujni huanti akstítum lama, chu nitú catilimamaxanicanti sampi tancs masiyúpat yamá xataluloktat xtachihuín Dios huantu mastay akaputáxtut.
- ¹⁶ Niucxni timaktanuya tamá c-taklhuhuatna talacapastacni huantu yunú xala catuxáhuat huantu nitú kalhiy xlakasi, chu ni maxquiy cčni Dios sampi caj pacs xtalacapastacnicán huanti ni lipahuanoy Dios, chu xlipacs huanti chuná likalhchihuínankoy lihuacá lilaktzankatayakoy c-talakalhín.
- ¹⁷ Chu yamá lixcajnit tachihuín huantu masiyukoy smanipasakoy

- amakapitzín, chu lalihuán takahuaníy xtachuná lantla aktum lixcajnit tztizi tu tzucuy stactahuilay. Hua yumá ti na chuná tlahuakoy huá Himeneo, xahua Fileto.
- ¹⁸ Cumu niáhl chuná canajlakoy xtaluloktat Dios, xlacán huankoy pi acxni naniyahu niáhl catilakastakuanahu calínín sampi lantla quililakastakuanatcán xuanit, aya kantaxtunít c-quilatamatcán, chuná lichihuínampulakoy, chu laklakalhínikonit xtaçanajlacán makapitzín.
- ¹⁹ Huampi quin stalanca catziyahu pi xtankaxca chiqui huantu Dios lihuana caxuilínit luhua tlihuaklh huí, ni lay pala çatum tí catilactláhualh, chu antá c-xlacán talaclhpittahuilanit yuma tachihuín: “Quimpuchinacán pacs lakapaskoy huanti tapaksinikoy”, chu alacatum c-xlacán namá huampalay: “Xlipacs huanti litayakoy pi lipahuanoy Quimpuchinacan Cristo calakmakankolh xlipacs huantu lixcajnit talakalhín.”
- ²⁰ Huix catziya pi antani tlaná huilaca c-aktum tlanca chiqui, luhua puscujni kalhicán, makapitzín pulatu xla oro, vasos xla plata, huampi na xahua kalhicán makapitzín xla quihui, chu xla tíyat. Yamá huantu xla oro, usu plata, caj xman puhuayankocán acxni tlahuacán tlanca çatánit, usu caj licacni likalhicán, chu makapitzín puscujni huantu xla quihui, chu xla tíyat caj chunatá tu līmaclacasquincán.
- ²¹ Pus xlipacs huanti lakmakankoy huantu lixcajnit talakalhín c-xlatamatcán, litaxtukoy xtachuná lantla vaso, chu pulatu xla plata, chu xla oro huantu Dios lipaxuhu namaclacasquinkoy, chu pacs tlan tu nalilacán.
- ²² Huix catamakatlīni xlipacs huantu ni mininikoy tlahuakoy huanti lakkahuasán la huix, chu ni chuná castalanikó, huata caj xman hua akstítum calilatapa mintacanajla

lantla lipahuana Dios, lantla paxquikoya amakapitzin, chu akstium calatapa c-xlakstipancan huanti xlipacs xlitlihuaka xnacucan quilhchanikoy Quimpuchinacan c-xoracioncan.

²³Huix calakmakanxi xlipacs huantu caj xtalacapistacnican huanti caj aklakuá limakslokoninamputunkoy masqui huankoy pi huá xaxlicana tlan talacapistacni, sampi huix aya catziya pi nitú xlakasi, huata caj antá limatzuquikoy tasitzin. ²⁴Sampi huanti aya macamaxquinit xlatamat Quimpuchinacan, ni pala tzinú mininiy caj xman naakslokonantakchokoy, huampi huata xlá mininiy pi caxaticahua tlan cacatzinikolh, chu cakálhilih tastácat laquimpi tlan makalhtahuakaná nahuán ti tancs namasiyuy xtalacapistacni Dios, chu napaxuhuanalenkoy huanti ni tuncán akatakskoy huantu masiyunikoy.

²⁵Chu lapí huí ti tanuj talacapistacni kalhikoy chu lakapaxtokkoy tachihuín, xlá mininiy pi xlipacs tasmalhuán, chu lacatzucu calistacyahuakó, chámpera xamaktun chuná Dios nalakalhamán, chu nacanajlakoy mintachuhuín pi kalhij xtalulóktat. ²⁶Chu chuná natzalanikoy akskahuiní huanti xtachín liliamakó, chu matlahuimákó huantu xlá lacasquin natlahuakoy.

**Lantla nalakoy tachixcuhuítat
acxni talacatzuhujamá
nahuán quilhtamacú lantla
namimpalay Cristo**

3 Timoteo, huix luhua milicáztit pi acxni aya talacatzuhujamá nahuán yama ahuatia quilhtamacu xlisputni çatuxáhuat, luhua scalajua namín quilhtamacú.

²Luhua chixcuhuín huanti caj xman xacstucan naaklihuankocan, xman huá luhua nalakatilacankoy nakalhiikoy luhua tumín, natlancaçatzikoy, luhua lactalipahu

namakcatzikocan lantla nalacapistacxkoy. Lhuhua ti lakahuán nalakoy, chu nalakachixcuhumakankoy xnatlatnacán, niucxni pala ti tú nalipaxcatatzinikoy, chu nitú nalixcixilhikoy Dios. ³Xlacan ni pala çatatum ti catilakalhamankolh, chu pala ti natlahuanikoy huantu nitlan, ni catimatzankanankolh, xahuachí xlacan tlanca xaaksaninanin nahuankoy, ni namakaxtaktayaputunkoy lantla tlakaj nalilakoy xmacnican, ni tzinú kayaj nacatzankoy, chu ni catiucxilhpuntankolh huantu tlan tascújut. ⁴Hasta xacstucan natzucuy laljakskahuinan, nalalitalakaspittayakoy, chu ni pala tzinú catilacamaxanankolh, tlanca lacapistacxin nahuankoy, caj luhua xman huá natzaksakoy lantla namakapaxuhuakoy xmacnican, ni xahuá catiputzakolh lantla nalimakapaxuhuakoy Dios xlatamatcan. ⁵Yama chixcuhuín caj huá natlahuakoy xtachuná pi çacninanikoy Dios natasiyukoy, masqui stalanca nalitasiyukoy xlipacs huantu lixcájnít tlahuakoy pi ni pala tzinú macamaxquiputunkoy xlatamatcan Dios. Xlipacs tama chixcuhuín huanti chuná lamakó huix ni camatalajlikó, caj catamakatlínikó.

⁶Sampi huá tama chixcuhuín huanti makapitzin litaxtukoy pi luhua lipahuankoy Dios, chu liakchihuínankoy xtachihuín, chu hasta ankoy lakapaxialhnankoy c-xhiccan yama lakahuitinin lacchaján huanti tlahuakonit luhua talakalhin c-xlatamatcan, chu masqui lilipuhuankoy caj xpalacata huantu lixcájnít tlahuakonit nialh lay lakmakankoy huantu tlahuakoy.

⁷Yama lacchaján ankalhin putzamakó lihuana nacatzikoy lantla luhua akstium nalatamakoy, huampi nialh lay akatakskoy xtaluloktat Dios.

⁸Yuma aksaninanin chixcuhuín talhtaninikoy xtaluloktat Dios chu ni lacasquinikoy nalakapascán; xtachuná lantla xamakan quilhtamacú yama çatuy scuhuananin huanti xuanikoacán Janes, chu Jambres, xlacán ankalhín xtalhtaninikoy Moisés, na chuná xlacán aya malaktzankayahuakonit xalixcajnít xtalacapastacnicán, chu nialh lipahuankoy Dios. ⁹Huampi ni luhua makas quilhtamacú catitapalhikolh, sampi xlipacs chixcuhuín nacatzikoy pi caj aksaninamakó, chu nitú xtacatzincán, na chuná naakspulakoy xtachuná lantla akspulakolh yama çatuy scuhuananin acxni ni matlanikolh huantu xlichihuinama kolutzin Moisés.

Akstitum calilatamáh Timoteo huantu masiyunicanit

¹⁰Huampi huix catziya pi luhua tanu lantla clilatamanit, sampi pacs kaxpatnita quintamasiyún, chu lantla quit akstitum clilatamanit, chu tu cmatxucputún c-quilatámat, chu huantu luhua ccanajlay, huix ucxilhnita lantla kalhnikonit tapaxquín natalanín, chu lantla cpaxuhuanalenit nitlán huantu quimapakspulicanit. ¹¹Sampi luhua lhuhua tu cpatinít, chu lhuhua tasokalín tu kalhinit. Huix catziya lantla quimapatinica c-xacachiquin Antioquia, chu c-Iconio, chu c-Listra, antani makchiya quilikamanankolh chixcuhuín ti antá xalanín, chu hasta quimputlakalemputunkolh, huampi acxni chuná xquintlahuamaca Quimpuchinacán quimaktáyalh, chu nitú quiakspúlal. ¹²Xlicana pi chuná quiakspulanit, chu na chuná xalán naakspulayán, sampi tancs catziyahu pi xlipacs yamá huanti akstitum latamaputunkoy sampi macamaxquikonit xlatamatcán Cristo, makapitzín

lhuhua huantu nalimapatinikocán, chu nasokalikocán. ¹³Sampi huanti ni lacuan chixcuhuín, chu ti akskahuinankoy, ankalhín naanankoy, chu hasta cax natalihuaquinikoy lantla naakskahuinankoy, chu hasta huatiyá xlacán nalakskahuikoy.

¹⁴Timoteo, huampi huantu huix mimpalacata, tlihuaklh catapini yama xtaluloktat Dios huantu aya catzininita, chu huantu lipahuana pi chuná lakchán, sampi luhua tlan licatziya pi talipahu huanti chuná masiyunikonitán. ¹⁵Sampi huix catziya pi hasta c-mincataskata, tzucunita masiyunicana lantla huan c-Xasantujlani Likalhtahuaka, antá huí lacuan tastacyahu huantu xtalacapastacni Dios, chu huá tlan nalilakmaxtuya milistacna lantla nalipahuana Cristo Jesús. ¹⁶Sampi xlipacs huantu tatzoktahuilanit c-Xasantujlani Likalhtahuaka, huá xtalacapastacni Dios, huá pacs timapuhuanikolh lantla natzokkoy huanti tzokkonit, chu pacs quin lantla nalikalhtahuakayahu nacatziyahu lantla tlan namasiyuyahu xtalacapastacni Dios, chu lantla namatancsayahu xtalacapastacni chatum huanti takskahuinit, chu ni akstitum lipahuán Dios, chu laquimpi na nacatziyahu nahuanikoyahu lantla natatlanikoy huanti aktzankatayakonit c-xlatamatcán, xahua lantla acxtum nalalitakalhichihuinanahu laquimpi akstitum natalamayahu quin huanti lipahuanahu Dios; ¹⁷chu laquimpi chuná xlipacs huanti tlahuaputunkoy xtascujut Dios nakalhikoy liskalala, xahua talacapastacni, chu chuná huantiakoy lantla namakantaxtikoy caxatucahuá lacuan tatlahu.

4 Cristo Jesús namimpalay xtachuná lantla chatum rey laquimpi namakalhapalikoy, natatlahuakoy cuenta xlipacs huanti lamakoj nahuán xastacná, chuná lantla ti aya nikonit

nahuán. Huá xp̄alacata c-xlacatín, x̄ahuá c-xlacatín Dios quit cl̄im̄apaksiyán: ²pi ankalhín cal̄iakchihuínantí xtachihuín Dios, n̄i nataxlajuaniya, huix cal̄ichihuínantí acxn̄i chixcuhuín kaxmatputunkoy, ch̄u hasta masqui acxn̄i xlacán n̄i kaxmatputunkoy, huix ankalhín cal̄it̄akalhchihuínankó. Camaakataksnikó huantí n̄i lihuana aakatakskoy, camahuixcanikó huantí taxlajuaniimakó c-xtac̄anajlacán, cahuanikó lantla akst̄itum x̄l̄ilatam̄acán huantí aktzankat̄ayaputunkoy, ch̄u ankalhín cal̄it̄lán, ch̄u lacatzuc̄u namasiyunikoya t̄i n̄i lay tuncán akatakskoy. ³Sampi namín quilhtamacú acxn̄i n̄ialh nakaxmatputunkoy huant̄u xax̄lic̄ana xtalacapastacni Dios, huamp̄i huata x̄m̄an huá naputzakoy huant̄u atzinú lakat̄ikoy, hasta l̄huhua chixcuhuín naputzakoy xakchihuínacán huantí nal̄iakchihuínanikoy huant̄u x̄m̄an xacstucán kaxmatputunkoy. ⁴Xl̄ipacs huant̄u xataluloktat xtalacapastacni Dios nalakmakankoy, huata huá nac̄anajlakoy huant̄u caj xatalatzapa tachihuín nal̄ichihuínancán masqui caj pacs xtalacapastacnican chixcuhuín. ⁵Huamp̄i huant̄u huix mimp̄alacata, acxn̄i pala tú tascújut natlahuaya, lihuana calacap̄astact̄i lap̄i chuná lakchán lantla tlahuaputuna, ch̄u acxn̄i lakchinán tapat̄ín, huix catayani, ch̄u cap̄axuhuanalipi, huamp̄i chunatiyá akst̄itum cal̄iakchihuínantí xtachihuín Cristo huant̄u mast̄ay lakt̄áxtut, x̄ahuachí x̄m̄an huá cal̄it̄akatzank̄a lantla lihuana namakantaxtiya mintascújut huant̄u lakayahuacan̄ita. ⁶Huamp̄i huant̄u quit quimp̄alacata, chunatiyá cl̄itamakaxtakn̄it lantla aktum līcaxt̄lahuán huant̄u nal̄icaxt̄lahuānicán Dios, chuná cuan samp̄i c̄puhuán pi talacatzuhuīma quilhtamacú lantla naquimakh̄it̄icán quilatámat, ch̄u nacniy. ⁷Huamp̄i

quit fuerza c̄tlahuanin̄it laquimp̄i nactayaniy c-quilatámat, ch̄u c-quintascújut, ch̄u cm̄akantaxt̄ikonit huant̄u Dios quil̄ilacsacn̄it, luhua xt̄achuná quitaxtunit lantla aktum takamán ant̄ani lat̄lajacán, huamp̄i aya lakchan̄it quilhtamacú nacchán ant̄ani quil̄ich̄inat xuan̄it, luhua can̄a cp̄axuhuy pi niucxn̄icú luhua ctat̄laj̄in̄it, ch̄u nit̄u claclatayama, huata fuerza cm̄akantaxtin̄it huant̄u Dios quimac̄uintaj̄lin̄it. ⁸Ahuatá ch̄u cmakal̄h̄ima acxn̄i Quimp̄uchinacán naquimaxquiya ch̄a c-akap̄ún quincorona, usu t̄ataquín huant̄u xl̄a m̄alacn̄un̄it namax̄quikoy x̄lipacs huant̄i makantaxt̄ikoy xtachihuín. Ch̄u n̄i caj x̄m̄an quit caquintim̄ax̄quilh huant̄u m̄alacn̄un̄it, huamp̄i na x̄ahuá namakl̄ht̄inankoy huant̄u nal̄im̄askahuicán x̄lipacs yamá huant̄i kalhkal̄h̄imakó acxn̄i namimp̄alay Quimp̄uchinacán samp̄i pax̄quikoy.

Pablo huan lantla Dios makt̄ayan̄it

⁹Timoteo, luhua x̄tlahua tlanca lītlán, aktum cacatz̄i fuerzaj catlahuani laquimp̄i pala naquilaktana. ¹⁰Sampi tam̄a Demas huant̄i caj x̄m̄an lakatiy lip̄axuhu nal̄ilatamay huant̄u un̄ú xala cat̄uxáhuat, aktum cátz̄ilh lhtuj quimakaxtakn̄it, ch̄u alh putzay huant̄u lakatiy c-xac̄achiquin Tesalónica. Quintalacan Crescente an̄it c-xatiy Galicia, ch̄u Tito na an̄it c-xatiy Dalmacia. ¹¹Caj x̄m̄an xacst̄u Lucas quintatamakaxtakn̄it. Catlahua lītlán caputzapi quintalacan Marcos, ch̄u acxtum catata samp̄i x̄lic̄ana pi cmaclacasquín c-quintascújut. ¹²Sampi yamá quintalacan Tíquico quit cm̄alakchan̄it c-Efeso. ¹³X̄ahuá acxn̄i natana natlahuaya lītlán naquil̄itaniya quintamkn̄u huant̄u cakxtakuil̄in̄it c-xac̄achiquin Troas c-xchic Carpo; na natal̄itana quilibros, huamp̄i nit̄u tipatzankaya luhua x̄lacasquinca

nalitankoya yama lacstacaca takasmilini xuhua antani ctzoknani.

¹⁴Xlicana pi luhua lipeca quimakalipuhuanit tama Alejandro huanti liscujkoy tlahuakoy pailas, sampi luhua tu nitlan quintlahuaninit. Huampi Quimpuchinacan namaxokoniylantla mininiy napatinan xpalcata huantu tlahuanit. ¹⁵Huix luhua skalalh calatapuli nitu tiaskahuiyan, sampi luhua lipeca lantla quincasitziniyan, chu ni matlaniy huantu quin lichihuinanahu xtachihuin Jesus.

¹⁶Acxni huacu quintamacaxtucac-pulachin laquimpi naquimakalhpalikoy mapaksinanin, ni pala chatum ti xquinkalhmaktayalh, lhtuj quintimakaxtakkolh xlipascan. Csquiniy litlan Dios pi ni xlimapatinikoca caj xpalcata huantu quintlahuanikolh. ¹⁷Huampi masqui pacs quintimakaxtakkolh, Quimpuchinacan ni chuna tlahuah, xahuá xla quimaxquilh litlihuaka laquimpi tlan nacliakchihuinan yama lipaxuhu xtachihuin Cristo huantu mastay laktaxtut, chu xlipacs yama huanti ni lakapaskoy xtachihuin Dios quit cmaxmatakolh lantla xla maakaputaxtiputunkoy xlipacs caxaticahua ti nalipahuankoy. Huampi

hua Dios quilakmaxtulh laquimpi ni naj naquimamknininankoy mapaksinanin, ¹⁸chu chunatiya cuintaj quintlahuama nahuán hasta yama quilhtamacu acxni nacchan c-xpumapaksin huantu huilacha c-akapun. iCaj xman xacstu mininiy namaxquican canni caxanilihuyaj quilhtamacu! Chuna calalh, amen.

Pablo ahuata xakatlilacankoy canajlanin

¹⁹Catlahua litlan, lipaxuhu caquixakatlinikopitit, chu huantu quimpalcata camacatiyakopitit Prisca, chu Aquila, na chuna xlipacs huanti huilako c-xchic Onesiforo. ²⁰Quintalacan Erasto anta tamakaxtakcha c-Corinto, chu Tróximo, cumu xtatatlay, anta tamakaxtakcha c-xacachiquin Mileto. ²¹Cpuhuan pi lacapalaj tuncan xtat xlimaku ni alakchan calonkni. Luhua lipaxuhu xakatlilacamakochan Eubulo, Pudente, Lino, Claudia, chu xlipacs natalanin huanti unu xalanin.

²²Clacasquin pi Quimpuchinacan Jesucristo acxtum catalataman, chu pi cacaucxilhlacachan xlipacs huixin, chu xataxajni cacamaxquin xtapaxquin, chu xtalakalhman.